

## БҮЮК АЛЛОМАЛАРГА ҚАНОТ БҮЛГАН ЗАМИН

**Манзура Холбаева**

*Наманган вилояти тарихи ва маданияти давлат  
музейи катт илмий ходими*

*“Бизнинг хавас қиласа арзийдиган буюк тарихимиз бор. Хавас қиласа арзийдиган улуғ ажододларимиз бор. Хавас қиласа арзийдиган беқиёс бойликларимиз бор. Ва мен ишонаман, насиб этса, хавас қиласа арзийдиган буюк келажагимиз, буюк адабиётимиз ва санъатимиз хам албатта бўлади.”*

*Ўзбекистон Республикаси Президенти  
Шавкат Мирзиёев*

Наманган – кўплаб буюк алломаларга қанот бўлган замин. Бу кўхна юртда Маҳдуми Аъзам Косоний, Бобораҳим Машраб, Фазлий, Нодим Наманганий, Мухаммадшариф Сўфизода сингари шоир ва маърифатпарварлар туғилиб ижод қилган.

Шу жумладан Исҳоқхон Жунайдуллахўжа ўғли Ибрат маърифатпарвар шоир, забардаст тилшунос, тарихшунос олим, илк ўзбек матбаатчиларидан бўлиб, 1862 йилда Наманган яқинидаги Тўракўрғон қишлоғида туғилган. Унинг отаси соҳибкор боғбонлардан бўлиб, «Ходим» тахаллуси билан шеърлар ёзган. Онаси Ҳурибиби қишлоқ қизларини ўқитган. Ибрат дастлаб қишлоқ мактабида, сўнгра онаси қўлида таҳсил олди. Кейинроқ Қўқонга бориб мадрасага ўқишга киради.

Исҳоқхон Ибрат 1886 йилда мадрасани тутатиб, Тўракўрғонга қайтиб келади. У ўз фаолиятини педагог сифатида қишлоқда маърифат тарқатиш билан бошлади. Ўша йили эски маҳаллий мактаблардан анча фарқ қилувчи янгиша мактаб очади.

Исҳоқхон Ибрат 1887 йилда ҳаж сафарига отланади. Сўнг у Шарқ мамлакатлари бўйлаб саёҳатни давом эттиради. Европанинг Истамбул, София, Афина, Рим каби марказий шаҳарларида бўлди, анча вақт Жидда шаҳрида истиқомат қилади, Бомбей ва Калкуттада яшайди. Исҳоқхон у ерларда қўп ишлатиладиган араб, форс, ҳинд-урду ва инглиз тилларини мукаммал ўрганди. У 1896 йилда Ҳиндистондан Бирма орқали Хитойга, сўнгра Қашқарга ўтди, Қашқардан ўз ватани Наманганга қайтиб келди.

1901 йилда араб, форс, ҳинд, турқ, ўзбек ва рус сўзларидан таркиб топган "Луғати сittta-алсина" («Олти тилли лугат») асарини босмадан чиқаради. Мазкур луғат жадид мактабларида шарқ ва рус тилларини ўрганишда бирдан бир қўлланма сифатида фойдаланиб келинди.

1907 йилда Тўрақўрғонда янги усул мактабини очган, 1908 йилда ўз қишлоғида «Матбааи Исҳоқия» номли литография ташкил қилган. Исҳоқхон Ибрат янги мактаблар очиш, ўқитувчилар тайёрлаш, аёлларни илм-маърифатли қилиш ишларида фаол қатнашган. 1909 йилда ўзининг «Тарихи чопхона», «Маданият ҳақида маснавий», «Газета хусусида», «Қалам» маҳаллий ва чор амалдорлари кирдикорларини фош этган «Илми Ибрат», шеърий тўпламлари нашр қилинган.

Исҳоқхон Ибрат 1912 йилда ёзувлар тарихига бағишиланган, асарида лотин, юнон, хитой, хинд, араб, кирилл ёзувининг келиб чиқиши, ривожланиш тарихи ҳақида маълумот берилган "Жомеъ ул-хутут" ("Ёзувлар мажмуаси") асарини яратди ва ўз матбааси "Матбаайи исҳоқия"да босмадан чиқарди.

Ибрат чин қалдан ўз халқининг илмли, маърифатли бўлишини истади. Кейинги 20-йил ичида 14 та илмий-тарихий, лингвистик асар ёзди. 30 йиллик поетик ижодининг мажмуи бўлмиш "Девони Ибрат" шеърлар тўпламини тузди. Тарихшуносликка оид "Тарихи Фарғона", "Тарихи маданият" ва "Мезон уззамон" илмий асарларини яратди.

Исҳоқхон Ибрат «Туркестон вилояти газети», «Садои Туркестон», «Садои Фарғона» газета ларига ёзган мақолаларида фан, маърифат ва маданиятни тарғиб этган.

Ибратнинг сўнгги йиллардаги ҳаёти анча таҳликали ўтди. 1935 йилдан у ҳамма лавозимлардан олиб ташланди. 1937 йилнинг апрел ойида 75 ёшли кекса шоир ва маърифатпарварни ҳибсга оладилар.

Наманган вилояти Тўрақўрғон туманидаги 14-ўрта мактаб ва Тошкентдаги бир кўчага Исҳоқхон Ибрат номи берилган.

Сермаҳсул шоир, ёзувчи, мусиқашунос, педагог Исҳоқхон Ибрат қатоғон қурбони бўлди.

У 1937 йил Андижон турмасида 2 ой ётгандан сўнг вафот этди. Унинг қабри қаердалиги номаълум. Адаб ўз асарларида халқ озодлиги, Ватан мустақиллиги учун курашганларни ва тарихий воқеаларни акс эттириди. Масалан: «Тарихи Фарғона» асарида шундай ёзади: «Хўжанд ва Ўратепа ва Жиззах қўлдан кетди. Русия забт этди. Минг икки юз саксон бешинчи ҳижрийда (1866) Самарқанд олинди. Андан Каттақўрғон олинди. Сўнгра ўртада амир ила мусолаҳа бўлуб, ислоҳот жорий бўлди... ».

XIX асрда Тўрақўрғон заминида туғилиб ўсган Ибрат домла араб, форс, рус, хинд, урду, инглиз, франсуз тилларини яхши билган, деди Президентимиз. Дунёning кўплаб мамлакатларида бўлиб, Шарқ ва Европа илм-фани, маданияти ва санъати билан яқиндан танишган, юртимизга илғор маданият ва техника янгиликларини олиб киришга интилган.

Ибрат домла ўлкамиздаги илк матбаачилардан бири сифатида, 1908-йил Оренбург шаҳридан литографик машина сотиб олиб, уни Оренбургдан Кўқонгача поездда, Кўқондан Тўракўрғонга тұяларга ортиб, катта мاشаққатлар билан олиб келган ва ўз ҳовлисида “Исҳоқия босмахонаси”ни ташкил қилган. Бу маърифатпарвар инсон қўплаб илмий, педагогик ҳамда бадиӣ асарлар яратган, ўз қишлоғида янги мактаб ва қутубхона очган, аҳоли учун замонавий боғ барпо қилган, ҳозиргача ғоят ноёб ҳисобланадиган олти тилли лугат яратиб, ўз босмахонасида чоп эттирган. Унинг “Фарғона тарихи” деган машҳур асари мамлакатимиз тарихига оид нодир манбалардан бириди.

Президентимиз ташаббуслари билан Тўракўрғонда Исҳоқхон Ибратга бағишлиланган сўлим боғ, ёдгорлик мажмуаси ва “Ибрат мактаби” ташкил этилган.

Боғ одамларнинг мазмунли ҳордиқ чиқаришига қулайлик яратиш билан маънавий оламини ҳам бойитади. Бу ерда маърифатпарвар бобомизнинг ҳайкали ўрнатилади. Музей Исҳоқхон Ибратнинг ҳаёти, серқирра фаолияти билан таништиради. “Ибрат мактаби”да ёшлар хорижий тилларни ўрганади. Буларнинг барчаси яхлит комплекс сифатида алломанинг халқимиз учун қилган буюк хизматларини қадрлаш, меросини ўқиб-ўрганиш ва тарғиб қилишда муҳим ўрин тутади.

Улуғ аждодимиз Ибрат тахаллусини ўзига бежиз танламаган, деди Президентимиз. Унинг Ватан ва юрт тараққиёти йўлидаги фидокорона ҳаёти нафақат ўз даврида, балки бугунги кунда ҳам барчамиз учун ҳақиқий ибрат намунаси бўлиб қолмоқда.

Хулоса ўрнида шуни айтиш мумкинки, маданиятимизнинг кўзга кўринган намояндалари, ўзининг ёрқин истеъдоди, билим ва маҳорати, фидокорона меҳнати билан жамиятимизнинг маънавий тараққиётига муносиб ҳисса қўшган, инсон қалбини, унинг дарду ташвишларини, халқнинг орзу-интилишлари, Ватанга муҳаббат ва садоқат туйғусини тараннум этишни ўз ҳаётининг маъномазмуни деб билган аждодларимиз тарихини домий ўрганиб бориш хар биримизнинг асосий бурчларимиздан ҳисобланади.